



Број/Број: 03/1-50-1-7-47 /10
Сарајево/Сарајево: 4. 1. 2010.godine

ČLANOVIMA ZAJEDNIČKE KOMISIJE ZA ODBRANU I SIGURNOST BiH

PREDMET: Izvještaj o učešću na Regionalnoj konferenciji o temi: „Jačanje sigurnosne saradnje s ciljem ranijeg pristupa EU zemalja Jugoistočne Evrope“, Tirana, 7. i 8. 12. 2009.

Veza, akt broj: 01,02,03,03/1-05-459/09

U organizaciji Parlamenta Republike Albanije, u Tirani je, 7. i 8. 12. 2009., održana Regionalna konferencija o temi: „**Jačanje sigurnosne saradnje s ciljem ranijeg pristupa EU zemalja Jugoistočne Evrope**“

Konferencija je održana s ciljem zajedničkog jačanja partnerstva i saradnje između zemalja Jugoistočne Evrope u općim sigurnosnim pitanjima, te isticanja parlamentarnih mogućnosti za osiguranjem dovoljnih resursa za sigurnosne zahtjeve u regionu, kao i unapređenja saradnje na polju granične sigurnosti, borbe protiv korupcije, organiziranog kriminala, nezakonite trgovine i drugih oblika transnacionalnog kriminala kroz donošenje neophodnog zakonodavstva. Konferencija je, također, imala za cilj afirmaciju nastojanja zemalja učesnica za budućom transformacijom demokratskih institucija vlasti i jačanjem vladavine prava, kao i tijela koja provode parlamentarni nadzor.

U radu ove konferencije učestvovali su predstavnici parlamenata: Albanije, Austrije, Bosne i Hercegovine, Crne Gore, Hrvatske, Grčke, Italije, Kosova, Makedonije i Turske.

U delegaciji Parlamentarne skupštine BiH na ovoj konferenciji bili su članovi Zajedničke komisije za odbranu i sigurnost BiH: Adem Huskić, Ivo Miro Jović i Mirko Okolić, te Jovica Katić, stručni saradnik u Zajedničkoj komisiji za odbranu i sigurnost BiH.

U ulozi moderatora i govornika na Konferenciji prisutnim parlamentarcima zemalja Jugoistočne Evrope obratili su se predstavnici vlasti Republike Albanije, kao zemlje domaćina, kao i predstavnici međunarodnih organizacija:

- Sali Berisha, premijer Albanije,
- Jozefina Topalli, predsjednica Parlamenta Albanije,

- Leonard Demi, predsjednik Komisije za sigurnost Parlamenta Albanije,
- Lulzim Basha, ministar unutrašnjih poslova Albanije,
- Edith Harxhi, zamjenica ministra vanjskih poslova Albanije,
- Ridvan Bode, ministar finansija Albanije,
- Bujar Nishani, ministar pravde Albanije,
- Husni Burgaj, generalni direktor Nacionalne policije Albanije,
- Ylli Alushi, zamjenik direktora Obavještajne službe Albanije,
- Eduard Kukan, predsjedavajući parlamentarne delegacije EU za odnose s Jugoistočnom Evropom i predstavnik predsjedavajućeg Parlamenta EU Jerzyja Buseka,
- Peter Vanhoutte, viši savjetnik u Centru za demokratsku kontrolu oružanih snaga – DCAF iz Ženeve;
- Wolfgang Grossruck, predstavnik Parlamenta Republike Austrije;
- Renato Farina, predstavnik Parlamenta Republike Italije;
- Pantelis Oikonomou, predstavnik Parlamenta Republike Grčke.

Konferencija je tematski bila podijeljena na tri cjeline. Na prvoj sesiji predstavnici parlamenata zemalja učesnica podnijeli su nacionalne izvještaje po pitanju granične sigurnosti i sigurnosnih prijetnji. U okviru ove sesije svoje izlaganje imala je i bosanskohercegovačka delegacija, a stanje u našoj državi u vezi s ovom problematikom predstavio je član Zajedničke komisije Adem Huskić. Na drugoj sesiji prezentirani su nacionalni izvještaji o borbi protiv korupcije, organiziranog kriminala, nelegalne trgovine i krijumčarenja, dok je na trećoj sesiji razgovarano o transformaciji demokratskih institucija u svjetlu provođenja parlamentarnog nadzora.

Konferencija je rezultirala potpisivanjem zajedničke Deklaracije predstavnika zemalja učesnica o saradnji parlamenata Jugoistočne Evrope, koju je, u ime Bosne i Hercegovine, u ulozi šefa delegacije, potpisao Adem Huskić.

Kao ključna tačka ove deklaracije navedeno je da će sve delegacije zemalja učesnica tražiti od svojih parlamenata da razmatraju prijedlog Parlamenta Albanije da se uspostavi Parlamentarna skupština Jugoistočne Evrope kao interparlamentarna organizacija, koja će promovirati bliske bilateralne i multilateralne političke i sigurnosne odnose među zemljama JI Evrope.

Treba napomenuti da delegacija BiH nije bila jedinstvenog stava kada je potpisivanje ove Deklaracije u pitanju. Naime, član delegacije Mirko Okolić je, ne dovodeći u pitanje sam sadržaj Deklaracije, koji je ocijenio nespornim, bio protiv njenog potpisivanja od strane bosanskohercegovačke delegacije, upozoravajući da će tim činom predstavnici BiH na predloženi tekst Deklaracije staviti svoj potpis zajedno sa predstavnicima delegacije Kosova, koje kao država nije zvanično priznato od strane Bosne i Hercegovine.

Tekst Deklaracije sastavni je dio ovog izvještaja.

Član
Zajedničke komisije
Adem Huskić

U prilogu:

- Deklaracija o saradnji parlamenata Jugoistočne Evrope na engleskom jeziku, potpisana od strane šefova delegacija svih zemalja učesnica;
- Deklaracija o saradnji parlamenata Jugoistočne Evrope na jezicima naroda BiH.

Dostavljeno:

- naslovu
- a/a